

Gbouŋ nba ki Pɔɔl din sɔb ki tur KOLOSA TEEB nae na

Ki jiin Kolosa teeb gbouŋ na po

Pɔɔl gbouŋ nba ki u din sɔb tur Kolosa doo ni niib na din saa Yiisaweira nba be leŋ na boore. Kolosa din tee dojaanne ki be Asia yent ni, Efesus yondo po.

¹ Min Pɔɔl nba tee Yiisa Masia toonii Yennu loomm paak, nan ti naa bik Timoti-e sɔbin gbouŋ na ² ki teen Yennu niib nba be Kolosa doo ni, ki tee ti naa waas nba teen Masia yada na. Ti Baa Yennu ninkpabaun nan u parmaasir-ii be nani.

Pɔɔl nba mei Yennu ki teenɔ niipoouk bianjinba

³ Yoo nba kur ki ti mei Yennu nba tee ti Yomdaano Yiisa Masia Baa na i paak, ti teenɔ niipoouko, ⁴ kimaan ti gbat yaa teen Yiisa Masia yada bianjinba, ki bia loon Yennu niib kura na, ⁵ kimaan pinpiik ni, yaa din gbat barɲanii nba tee barmɔnii yoo nba, i din gbat bonɲana nba guui Yendouŋ ni na poe. ⁶ Ki barɲanii maɲe baari, nan laa yat ki kpaatir tingbouŋ na kur po ki ɲammit niib binbeŋ, ki bia tuun nna i mɔŋ boor ni, laa nyii daar nba ki i din gbat ki bann Yennu ninbatinu nan barmɔnii maɲ nba tee bianjinba nawa. ⁷ I din tumii Yennu ninbatinu maɲ po ti toontunnanloɔ Epafraŋ, wunba ki ti loono na boore; ɲɔɔe tee Masia toontunno nba

tuun nan barmonii i boor ki turit, ⁸ ki bia betit i lomm nba tee bianjinba, Yennu Seyeen ni.

⁹ Linba na paak, taa daan gbat i po, ti ki nyik Yenmiaru i paaki, a ɲɔɔ Yennu n te ki i bann u loomm nba tee bianjinba, ki turi Seyeen yan nan li subinii kur, ¹⁰ ki yin fit kii be nan ti Yomdaano nba loon bianjinba na, ki bia fit kii tuun linba sii pent u par, ki fit kii tuun toonɲana kur, ki ɲammit bant Yennu. ¹¹ Ɗɔɔ Yennu n turi paɲ bonchiann, nan waa mɔk paɲ kur bianjinba na, linba saa te ki i mɔk gbankur nan sukuru nan parpeenn bonsiar kur ni. ¹² Ii teen ti Baa Yennu niipoouk man. Ɗɔɔe te ki ti jaɲ nan tin la yiar u boor, yentu ni, u niib sinsuuk ni, ¹³ ki bia nyinnit Sintaanii bunbɔnn naan ni, ki jiit ki kɔont u Bilonkak maɲ naan ni. ¹⁴ U Bija maɲ paak, ki u nyik chab ti biit, ki nyinnit daabisin ni.

Masia nan u toona labaar

¹⁵ Soɔ kan fit la Yennu, ɲaan u Bija Masia-e tee u naauɲ. Ɗɔɔe gar bont kura, ki tee Yennu bonnankara kur yur, ¹⁶ kimaan u nie ki Yennu din nan bonsiar kur nba be sanpaapo nan tingbouɲ na ni. Ɗɔɔe din nan taa laat bona nba, nan taa ki laat bona nba kur, narimii nba tee yentdamm, nan yomdamm, nan yudamm, nan yiikoo damm. Li din nyii Masia nie ki Yennu nan bonsiar kura ki jii bonsiar kur turo. ¹⁷ Ɗɔɔ Masia din be ki soɔ siar daa kaa, ki u paake ki bont kur be. ¹⁸ Ɗɔɔe tee u niib yur, ki bi tee u gbanant. U niib maɲ manfoor nyi u boore. Ɗɔɔe tee pinpiik, ki tee Yennu Bija, ki din kpo ki fiir kuun ni sinsinn, a u kuukɔɔ-ii tee bonsiar kur

yudaano, ¹⁹ kimaan li din maŋ Yennu tiŋ nan Masia-ii mək ɲoo Yennu binbeŋ nan barmonii. ²⁰ U Bija maŋ paake ki Yennu te bont kur nba be sanpaapo nan tiŋ ni ɲamm teen u yooŋnba. Ki sɔn nba nyii u Bija maŋ ni dapunpunn paak na paake, ki u te ki parmaasir be timm nan ɲoo Yennu sinsuuk ni.

²¹ Sianyoo, i dudukbiit nan i toonbiite din te ki i tee Yennu datai, ki fɔk nano, ²² ɲaan mɔtana, u Bija gbanant kuun maŋ paak ki u ji teeni u yooŋnba, a wun jii-i ki yii tee popeendamm, ki daa mək jakint koo biit, ki baar u boor. ²³ Li paak, ii yiab nan barmonii kii be i yada ni kii see chimm, ki daa fɔrii nyi i dindann ni, dindann nba ki i la yoo nba ki i din gbat barɲanii na; ki bi din mɔont barɲanii maŋ ki tur niib kur nba be tingboun na ni; ki min Pɔol tee li toontunno na.

Pɔol nba teen Masiaweira toontunno bianjinba

²⁴ Mɔtana n mək parpeenn n biak dinu ni i paak, kimaan maa di biak maŋ bianjinba na, n tontir biak nba ki Masia din senn a n di, u gbanant nba tee u weira paak nae. ²⁵ Ki Yennu nba turin toonn maŋ a n tun na, ɲooe teenin Masiaweira maŋ daabir, i sommir paak, a niib n bann Yennu barii maŋ. ²⁶ Barii maŋe tee woonin ni maan nba ki Yennu din woon sianyoo, ki nibooru kur ki bannir, ɲaan ki u tan fiit wann u niib mɔtana na. ²⁷ Yennu lor a wun fiit woonin ni maan na ki wann u niib maŋe. U woonin ni maan maŋ ɲan bonchiann, ki tee niib kur yar. Li want nan Masia be i ni; li paak, i mək dindann nan Yennu saa te ki i be fanu nan waa be na.

²⁸ Li paak, Masia manj poe ki ti mɔɔntir, ki kpaan sɔɔ kura, ki dia yanbooru kur ki want sɔɔ kur, a tin te sɔɔ kur n chee Masia weiu ni, ki tin jiib tur Yennu. ²⁹ Linba na paak ki n lek yiab nan paŋ kur nba ki Masia turin, ki li yab bonchiann na.

2

¹ N loon yin bann n baka nba be yimm, nan Masiaweira nba be Laodisea na, nan binba daa ki mi lan na ni bianjinbae. ² N yaa bi para n chee-e, ki bin lakin taan leeb nan lomm, ki bann Yiisa barii paak, ki teenɔ yada nan barmɔnii, ki bann Yennu woonin ni maan nba tee Masia na; ³ ɲɔɔ kuukɔɔe mɔk barmɔnii yan nan bannu kura.

⁴ Li paake ki n beeri, i daa te ki sɔɔ n jii mɔmant ki kpannini, ⁵ kimaan maa lek ki be i peŋ nan n gbanant na, ɲaan n seek be nani, ki n par peen i paak, maa la yaa be fanu bianjinba, nan yaa teen Masia yada nan barmɔnii bianjinba na.

Barmɔnii manfoor be Masia nie

⁶ Bianjinba ki i din gaar Yiisa Masia a wuu tee i Yomdaanɔ na, ii be u ni nna man, ⁷ ki sikin i yada jiina u ni, ki i yada-ii be u ni, kii mɔk paŋ nan baa din wanni bianjinba na, kii teenɔ niipoouk yoo kur.

⁸ Li paak, i daa te ki sɔɔ dia nisaarik yan kpinkpann-yana ki kpanni; linba ki gaa nan Masia, ɲaan tee tingbouŋ na yan nan nisaarik wannu, ⁹ kimaan Masia gbanant nie ki Yennu binbenj be, ¹⁰ ki i gaar barmɔnii manfoor, kimaan yaa gaa nanɔ na paak. ɲɔɔe tee yudamm nan paŋ damm kura saakɔɔ.

11 Yimm nan Masia benu paake ki i gaar punpotu, ŋaan li ki tee nisaarik nba jii u nuu ki pot i gbanant na kaa, ŋaan Masia nba poti nae. Li potu nyinnit biit ni, 12 kimaan baa din wuri Yennu nyunwuru yoo nba na, i din pukin Masia poe ki bi pii-i, ki i bia fiir nano nyunwuru maŋ ni, i yada nba be Yennu paŋ toona nba din fiin Masia kuun ni na paak. 13 I din tee kpeemme sianyoo, kimaan i toonbiit paak nan yaa din ki tee Juu teeb, ki bia ki mək sennu na paak. Ŋaan motana, Yennu nyik chab i toonbiite, ki turi manfoor, Masia ni. 14 Baa din kpaau dapunpunn paak yoo nba na, u din kpeen ti biit pann nba din sob dɔɔ na nan li sennu munna. 15 Dapunpunn maŋ paake ki Masia din biir Sintaanii nan narinbiit paŋ kura, ki nyinn waa din nyannib bianjinba na siara paanu ni.

16 Li paak, i daa te ki sɔɔ senti sennu yaa sii di linba, koo yaa sii nyu linba. I daa te sɔɔ gani jaamm dagaŋa, koo ŋmaapaan daa, koo foon daa ki teenini. 17 Li sennu booru din tee yunyuno ki want nan sɔɔ baat. Li yooe tee Masia. 18 Sɔɔ-i yaa ŋooe gar leeb ki laat yirintii, ki loon yin sikin i mɔŋ kii jiantir malakanba, i daa saaki; nna saa biirie. Li daano dont u mɔŋ, u dudukbiit ni, ki li kaa paaki. 19 U ji ki dia Masia; Masia-e tee u niib yur, ki taamm, ki bi gaa nan leeb ki tee nan gbanant tukita nan li jiina na, ŋoo Masia-e dintib ki bi nobii nan Yennu nba loon bianjinba na.

Barmɔnii manfoor nyi Masia nie

20 I kpo nan Masia-e, ki u fati durinya na narimii paŋ yent ni, ki bee ki i ji be nan i bia

daa tee tingbouŋ na yabe na? Bee teen ki i jobi i mɔŋ ki teen sennii nba yaa ²¹ “A daa dia na,” koo “A daa lemme linba na,” koo “A daa siit na?” ²² linba ki niro saa di ki lin biir ki kan yukiri. Li sennii tee nisaarii wannue. ²³ Setik nan mɔnii, li sennbooru naan linba mɔk yame, ŋaan li ki mɔki; bi jiantir baa loon bianŋinbae, ki kpann a bi sikint bi mɔŋe, ki mukis bi gbanant; ŋaan niro-i wei linba na kur, li kan fit sommɔ ki wun dia u gbanant loommu.

3

¹ I din fiir nan Masia kuun niwa, li paak, ii jii i para ki gaan nan sanpaapo bona, siaminba ki Masia kar Yennu niidiitu po na. ² Ii lor i dudukit nan leŋ bona, ŋaan daa lorin nan tingbouŋ na bona kaa, ³ kimaan i poŋ din kpo nan Masia-e, ki i manfoor be nana, Yennu boor. ⁴ Masia nba teent manfoor na nba tan saa dɔkit yoo nba, i mun tan saa dɔkit nanae nan yentchiŋ.

Manfopaann nan manfokper labaar

⁵ Li paak, ii nyik tingbouŋ na ni niŋ nba tuun toona i ni na; li yenn-nbae tee bonchon-chonsin, nan jakint toona, nan kunkɔmaasu, nan dudukbiit, nan nianchiŋ. Nianchiŋ tee nan patmannu nae. ⁶ Linba na nba paake ki Yennu wutoor tan saa do binba ki sak u mɔb na paak. ⁷ Sianyoo linba na nbae din tuu yeni, ki i be li ni.

⁸ Ŋaan mɔtana, ii fian linba na nba munn ki lu; ŋanne tee nan, nan wutoor, nan nifobisin. Ki niib sanbiik, nan barbiit ji daa nyi i mɔi ni. ⁹ I daa fa faak ki teen leebi, kimaan i poŋ nyik linba

tuu tee i binbenkperik na nan li toonawa, ¹⁰ ɲaan ji mək linba tee binbenpaaje. Binbenpaan nae ki Yennu nba tee li nantɔɔ na pantir yoo kura, ki li naan u mɔŋ binben, a wun te ki yin banno setik nan mɔnii. ¹¹ Li paak, bɔkitu ji kaa binba tee Juu teeb nan binba ki tee Juu teeb sinsuuk ni; binba pot puna nan binba ki pot kura ji ki mək bɔkitu nan leebi; bɔkitu ji kaa nigamm nan muuk ni yab sinsuuk ni; bɔkitu bia kaa daaba nan yent-n-mɔŋ damm sinsuuk ni, ɲaan i kur tee Masia yabe, ki u be i kur ni.

¹² Li paak, yaa tee Yennu nigannkab ki tee popeendamm ki bia tee u walonkai na, ii mək ninkpabaun, nan burchint, nan sikin-n-mɔŋ, nan soon nna binben, nan sukuru, ¹³ kii di sukuru nan leeb; ki sɔɔ-i mək bunburimii nan u lɔɔ, wun nyik chabɔ. Li kpaas talas ki yin mun nyik chab leeb nan ti Yomdaano nba pon nyik chabi bianjinba na. ¹⁴ Ii pukin lomm; ɲanne fan ki gar binben kur, ki taan dia li kur nan barmɔnii mɔtaauk. ¹⁵ Ii ɲaan ki Masia parmaasir na-ii ɲmakitir yaa dukii linba; Yennu lakin yiini gbananyennkɔɔ ni, a yii mək parmaasir mane. Li paak, ii teen Yennu niipoouk man. ¹⁶ Li kpaas talas ki Masia labaar na-ii be i para ni chib chib, ki yii want i leeb, kii bia kii kpaan i leeb nan yan; kii yiin Yennu gbouŋ ni yanii, nan Yenpaku yanii, nan Seyeen yanii; kii yiin yanii man nan niipoturu para kii teen Yennu. ¹⁷ Li paak, yaa tuun linba, koo yaa yeen linba, ii tuun ti Yomdaano Yiisa sann ni, kii teen ti Baa Yennu niipoouk u paak.

Masiaweira binbenj labaar

¹⁸ Poob, ii jii i mɔŋ tur i sɔrib, nan laa kpaat talas ki Masiaweira-ii tuun bianjinba na.

¹⁹ Jab, ii loon i poob man, ki daa diab nan tonu.

²⁰ Waas, ii saak i damm mɔi yoo kura, kimaan ŋanne pent Yennu par.

²¹ Baanba, i daa dont i waas wutoa, i-i tee nna bi ji kii mɔk kpaŋ-n-mɔŋi.

²² Daaba, ii saak i yomdamm mɔi bonsiar kur ni, ki li daa tee yoo nba ki bi gorii-i na kuukoo kaa, a yin penn bi para ki bin paki, ŋaan ii tuun nan ninmɔnn yoo kura, kimaan yaa baakit ti Yomdaano na. ²³ I-i tuun linba kur, yin tun nan i para kur, nan i tuun teen ti Yomdaano na, ki li ki tee nisaarik kaa. ²⁴ Ii tian man nan ti Yomdaano maŋ tan saa turi nyoot nba tee u niib yar sanpaapo, kimaan Masia-e tee barmonii Yomdaano ki i tuun teeno. ²⁵ Biitdaano kur mun tan saa gaar u toonbiit tubdatu, waa tun linba paake, kimaan Yennu tan saa dat u tubir, ki lukitin kaa.

4

¹ Yomdamm, ii tuun fanu kii teen i daaba man, kii mi nan i mɔŋ mun mɔk Yomdaano Yendoun ni.

Kpaanii

² Ii yiab nan Yenmiaru man, kii mei ŋoo Yennu nan ninmɔnn, kii teeno niipoouk, ³ kii biaki meio kii teent ki tin fit la yaak ki mɔont barjanii na, ki fiit Masia woonin ni barii, kimaan barii maŋ paake ki n be dansarik ni na. ⁴ Li paak, ii mei

Yennu kii teenin ki n fit pak nan laa kpaas talas min pak fanu bianjinba na.

⁵ Ii mi man i binben nba tee bianjinba ki tur binba ki tee Masiaweira na, ki jii i yoo kii piak u po. ⁶ Li kpaas talas ki i mɔbona-ii man, kii mɔk baakir, ki yii mi bianjinba ki i saa gat buboit ki lii took ki tur sɔɔ kur.

Foontjoontii

⁷ Ti naa bilonkak Tikikus, wunba tee ti barmɔnii toontunnɔ, ki bia tee ti toontunnanlɔɔ ti Yomdaano toona ni na saa beti n po. ⁸ Li paake ki n tuumɔ i boor, a wun beti ti kur nba be bianjinba, ki i para n doɔr. ⁹ Nɔɔ nan Onesimus, ti naa bilonkak nba ki ti teenɔ yada ki u tee i yoo nae saa baar. Bi saa beti bonsiar kur nba tuun nna na.

¹⁰ Aristakus nba ki min nan nɔɔ be dansarik ni na foonti, ki Banabas poorɔ bija Mak mun bia foonti. (I daan pon gaar n kpaanii nan Mak-i tani baar i boor, yin gaarɔ.) ¹¹ Joosua, wunba sanleer tee Justus na mun teeni u foontii. Bi bantaa nba na kooe tee Juu teeb nba waa Masia ki tuun nanin Yennu naan toona man. Njamme maant n par.

¹² Epafraas, wunba mun tee i yeno ki bia tee Yiisa Masia toontunnɔ na foonti. U mei Yennu nan ninmɔnn yoo kura ki teeni, a Yennu n te yin set kenken, kii tee subirteeb nba tuun Yennu loomm, ¹³ kimaan n dii u siara nan u set tun bonchiann ki somm yimm nan Laodisea teeb nan Hierapolis teeb. ¹⁴ Ti naa bilonkak Luk, wunba tee dokta na, nɔɔ nan Demas foonti.

¹⁵ Ii foont ti naa walonkai nba be Laodisea na, ki bia foont ti niipoo Nimfa nan Masiaweira nba lakint leeb u ŋaak ni ki jiantir Yennu na. ¹⁶ I-i karin gbouŋ na gbenn yoo nba, yin yabir ki bia karin ki tur Masiaweira nba mun be Laodisea na, bi tintaanu ni, ki bia karin Laodisea teeb gbouŋ nba ki n daan sob turib na. ¹⁷ Ii bet Akipus a wun yabir u moŋ kii tuun toona nba ki ti Yomdaano din turo na fanu.

¹⁸ Min Pool sobin nan n moŋ moŋ nuue ki foonti na.

I daa tammit nan n be nan bante.
Yennu ninkpabaun-ii be nani.

Yennu Gbouj Moor
Bimoba: Yennu Gbouj Moor Bible

copyright © 2003 Wycliffe Bible Translators, Inc.

Language: Bimoba

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 29 Sep 2022 from source
files dated 11 Jul 2022

00d89ba0-4677-52d9-9bc5-aa3d7c5c966d